

दिनांक : 27.03.2026

समय : 18.45 बजे

आकाशवाणी जयपुर-अजमेर  
प्रादेशिक समाचार

- केन्द्र सरकार देश मांय काम लेवण सारू पेट्रोल अर डीजल माथे एक्साइज ड्यूटी मांय 10 रुप्या प्रति लीटर री कमी कीनी।
- राज्य सरकार खाद री कालाबाजारी, जमाखोरी अर गैर-कानूनी तरीका ऊं लावण-ले-जावण माथे रोक लगावण सारू करडा कदम उठावेला।
- राज्यपाल हरिभाऊ बागडे जनता ऊं 'अर्थ ऑवर डे' रे मौके बिजली री बचत मांय योगदान री अपील कीनी।
- प्रदेश रा घणखर हलकां मांय आवता तीन-चार दिन आंधी-बारिश रा आसार।

000

केन्द्र सरकार पेट्रोल और डीजल री घर मांय खपत सारू केंद्रीय उत्पाद शुल्क-एक्साइज ड्यूटी मांय दस रुप्या प्रति लीटर री कमी कीनी है। वित्त मंत्री निर्मला सीतारामन सोशल मीडिया पोस्ट रे जरिए आ जाणकारी दीनी। वे बतायो के इण ऊं ग्राहकां ने बधती कीमतां ऊं साता मिलेला। वित्त मंत्री बतायो के डीजल दिसावर मांय बेचण परां 21 रुप्या 50 पैसा प्रति लीटर अर हवाई जहाज मांय काम आवण वाळा ईंधन माथे 29 रुप्या 50 पैसा प्रति लीटर शुल्क लगायी ज्यो है। वित्त मंत्री नई दिल्ली मांय खबरनवीसां सागे बातचीत करता थकां कहयो के पेट्रोल, डीजल अर हवाई जहाज मांय काम आवण वाळा तेल-एटीएफ रा मोल मांय बधोतरी नी व्हेला।

-----

मुख्यमंत्री भजनलाल शर्मा एक्साइज ड्यूटी मांय कमी रा फैसला रो स्वागत कीनो है। सोशल मीडिया पोस्ट रे जरिए श्री शर्मा कहयो के इण ऊं लाखां पिरवारां ने माली संबल मिलेला। वे जनता ऊं अफवाहां ऊं दूर रेहवण री अरज कीनी। ई बीचे राज्य मांय रसोई गैस री कालाबाजारी रोकण सारू रसद विभाग अर प्रशासन छापामारी कर रह्या है। आज भीलवाड़ा जिला मांय टेम्पो मांय गैस भरण रा गैर-कानूनी तौर ऊं चलाया जा रह्या पम्प ने रसद विभाग रा अहलकार सील कर दीनो।

000

देश मांय लारला दस साल मांय यूरिया रो उत्पादन दो सौ 30 लाख मीट्रिक टन ऊं बध र 3 सौ 15 लाख मीट्रिक टन व्हे ग्यो है। रसायन अर उर्वरक मंत्री जे पी नड्डा आज लोकसभा मांय एक सवाल रो जवाब देता थकां आ जाणकारी दीनी।

वे बतायो के खाद रो उत्पादन बधावण सारू साल 2014 ऊं गोरखपुर, सिंदरी, बरौनी, रामागुंडम अर पानागढ़ समेत न्यारी-न्यारी ठौड़ां नुवा खाद कारखाना लगायी ज्या है। नड्डा कहयो के उनाळू साखां सारू देश मांय जरूरी खाद मौजूद है।

-----

000

कृषि अर उद्यानिकी मंत्री डॉ. किरोड़ी लाल मीणा कह्यो है के राज्य मांय खाद री कालाबाजारी, जमाखोरी अर गैर-कानूनी तरीका ऊं लावण-ले-जावण ने रोकण सारू करड़ा कदम उठाया जावेला। वे आज जयपुर मांय खरीफ-2026 सारू खाद रा प्रबंधन रा बारा मांय राख्यी ज्यी मीटिंग मांय बोल रह्या हा। कृषि मंत्री खाद री कालाबाजारी रोकण सारू अहलकारां ने सरहदी जिलां री चेकपोस्टां माथे करड़ी निगराणी राखण रा हुकम दीना। वे नीम चढ़ायोड़ो यूरिया कारखानां मांय काम लेवण माथे रोक लगावण अर औचक जांच करण बाबत् ई कह्यो। डॉ. मीणा बतायो के खाद रा गलत इस्तेमाल अर वां ने दूजी ठौड़ भेजण ने रोकण सारू आई-एफ-एम-एस पोर्टल ने एग्री स्टैक ऊं जोड़्यो जावेला।

000

शिक्षा अर पंचायती राज मंत्री मदन दिलावर अध्यापकां ऊं विद्यार्थियां मांय भणाई सागे नैतिक, चारित्रिक अर मानवीय गुण विकसित करण बाबत् कह्यो है। वे आज कोटा रा रामगंजमंडी मांय पीएमश्री राजकीय उच्च माध्यमिक विद्यालय कानी ऊं राख्यी ज्यी एक कार्यक्रम मांय बोल रह्या हा। दिलावर कह्यो के सरकार सामाजिक मूल्य, नैतिक अर मानवीय गुणां ने भणाई-लिखाई मांय शामिल करण माथे खास ध्यान दे रही है।

000

राज्यपाल हरिभाऊ बागड़े जनता ऊं काल 'अर्थ ऑवर डे' मांय शिरकत करण री अरज कीनी है। ई रा तैत लोक भवन मांय ई रात साढ़े आठ ऊं साढ़े नौ बज्यां ताई बिजली रा सगळा गैर-जरूरी उपकरण बंद राख्या जावेला। राज्यपाल कह्यो के एक घंटा सारू बिजली बंद राख र बिजली बचावण मांय योगदान कर्यो जा सके है। ध्यानजोग है के ऊर्जा रा महत्त्व अर पर्यावरण री हिफाजत रा बारा मांय जाग जगावण सारू दुनिया भर मांय 'अर्थ ऑवर डे' मणायो जावे है।

000

मेड़ता-पुष्कर बीचे रेलवे लेण डालबा रो काम सुरू व्हे ग्यो है। रेल मंत्री अश्विनी वैष्णव आज राज्यसभा मांय एक सवाल रा जवाब मांय आ जाणकारी दीनी। वे बतायो के इक्यावन किलोमीटर लम्बी लेण डालण री करीब आठ सौ करोड़ रुपया रा खर्च वाळी ई परियोजना सारू जमीं अधिग्रहण रो काम तेज कर दियो ज्यो है। ई सारू जमीं अधिग्रहण ऊं जुड़्या जरूरी हुकम जारी कर दिया ज्यो है।

000

जोधपुर कने भगत की कोठी रेलवे टेशन ने मेगा आवता दो साल मांय रेलवे हब रा तौर विकसित कर्यो जावेला। रेल मंत्रालय ई सारू करीब 398 करोड़ रुपया री योजना मंजूर कीनी है। ई रा तैत टेशन माथे प्लेटफॉर्म री तादाद मौजूदा तीन ऊं बधा र सात करी जावेला। भगत की कोठी टेशन माथे हाईटेक कोचिंग टर्मिनल अर नुवो यार्ड बणायो जावेला, जठे रोजीना 12 ऊं 14 गाड़ियां री सार-संभाल करी जा सकेला।

000

राज्य मांय आवता तीन-चार दिन ताई जोरदार बायरो बाजण सागे बिरखा व्हेवण रा आसार है। मौसम केंद्र जयपुर रे मुजब आज दोपहरां पाछे ई राज्य रा केई हलकां मांय जोरदार बायरो बाज्यो अर कटे-कटे हल्की बिरखा व्ही। काल जोधपुर अर बीकानेर संभाग सागे शेखावाटी अंचल मांय आंधी चालण अर बिरखा व्हेवण रा आसार है। मौसम विभाग रे मुजब दीतवार ने जयपुर, अजमेर, भरतपुर, उदयपुर अर कोटा संभाग मांय बादळां री गाज सागे आंधी चालण री संभावना है। मौसम केंद्र किसानां ने काट्योडी साखां ने भीजबा ऊं बचावण सारु हिफाजत सागे राखण री राय दीनी है।

000

हनुमानगढ़ जिला मांय चाल रह्या 'राजसखी मेळा' मांय स्वयं सहायता समूहां री महिलावां कानी ऊं बणायी ज्या सामान खास तौर ऊं पसंद कर्या जा रह्या है। 29 मार्च ताई चालण वाळा ई मेळा मांय पंजाबी अर राजस्थानी सांस्कृतिक कार्यक्रम ई राख्या जा रह्या है। मेळा रा जिला प्रबंधक वैभव अरोड़ा बतायो के मेळा मांय हाथ री कारीगरी ऊं बण्या अर दूजा सामान री खरीदी सारु मोटी तादाद मांय लोग पूग रह्या है।

000

जयपुर रा राजकीय रामचंद्र खेतान पॉलिटेक्निक कॉलेज मांय आज रोजगार शिविर लगायी ज्यो। कौशल, रोजगार और उद्यमिता विभाग रा उप-प्रादेशिक कार्यालय जयपुर री उप-निदेशक नवरेखा बतायो के महकमा री सालाना कार्ययोजना रा तैत राख्यी ज्या शिविर मांय नौजवानां ने करियर मार्गदर्शन अर नौकरी-धंधा रा मौका मुहैया करायी ज्या।

000

झुंझुनूं जिला मांय आबूसर रा कृषि विज्ञान केंद्र मांय खाद री खुदरा बिक्री करण वाळां सारु लगायी ज्यो 15 दिन रो सिखावण शिविर आज पूरो व्हे ग्यो। ई मौके सिखावण लेवण वाळां रो इम्तिहान ले र वां ने सर्टिफिकेट दिया ज्या। कृषि विज्ञान केन्द्र रा वरिष्ठ वैज्ञानिक डॉ. दयानंद बतायो के ई कार्यक्रम रो मकसद खाद बेचण वाळां ने तकनीकी तौर ऊं होशियार बणावणो है ताकि वे किसानां ने खाद सही अर संतुलित तरीका ऊं काम लेवण रा बारा मांय जरूरी जाणकारी दे सके।

000

जल संसाधन प्रबंधन रा हलका मांय बेहतरीन काम सारु राजस्थान ने जल शक्ति मंत्रालय री ओर ऊं शीलड अर मान पानो दे र नवाजी ज्यो है। राज्य ने ओ मान पाणत री मोटी अर मझला दर्जा री परियोजनावां री पहली गणना रो काम टेमसर पूरो करण सारु दियो ज्यो है। नई दिल्ली मांय राख्यी ज्या विश्व जल दिवस समारोह रे दौरान जल संसाधन विभाग रा चीफ इंजीनियर ओ ईनाम लीनो। जल संसाधन मंत्री सुरेश सिंह रावत महकमा रा अहलकारां अर इंजीनियरां री कोशिशां री सराहवणा करता थकां इण ने सगळां कानी ऊं मिल र बेहतरीन काम करण रो नतीजो बतायो।

000

राज्य स्तरीय अंबेडकर पुरस्कार-2026 पुरस्कार सारू अर्जी देवण री काल आखिरी तारीख है। सामाजिक न्याय अर अधिकारिता विभाग रा निदेशक आशीष मोदी आ जाणकारी दीनी। वे बतायो के ज़िला स्तर रा पुरस्कार सारू 5 अप्रैल ताई अर्जियां दी जा सके है। मोदी बतायो के अ ईनाम डॉ. भीमराव अंबेडकर री जयंती रे मौके 14 अप्रैल ने दिया जावेला। अर्जियां डाक रे जरिये या महकमा रा दफतर मांय पूग र जमा करायी जा सके है। राज्य स्तर रा ईनाम सारू अर्जी जयपुर रा निदेशालय मांय अर जदके जिला स्तर री अर्जियां संबंधित ज़िला दफतरां मांय दी जा सके है। ईनाम रा तैत राज्य स्तर माथे एक लाख रुपया ताई री रकम जदके दूजी श्रेणियां मांय 51-51 हज़ार रुपया री रकम सागे मानपाना दिया जावेला।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 29 मार्च-दीतवार ने विचार बतावेला। आ ई कार्यक्रम री 132वीं कड़ी व्हेला। ई सारू आप ई मुफ्त नम्बर 1800-11-7800 माथे 27 मार्च ताई राय दे सको हो। विचार नरेन्द्र मोदी एप अर माय जीओवी ओपन फोरम रे ज़रिए ई भेजा जा सके है।

000